

欽定剿平粵匪方略

欽定剿平粵匪方略卷四百十三 乙丑年

十一月十一日

壬申

瑞麟郭嵩燾奏言自官軍收

復和平後逆匪敗走連平州屬之上坪等處其地萬山環繞途徑紆曲賊深溝高壘爲踞險負隅之計並於我軍必由之下坪煖水總口密布礮臺層層固守十月初九日李福泰派都司鄧安邦等分路前進並令都司方鼐等備帶火器

以降人賴侍龍爲前導由赫陂翻過山巔繞出大水口之後是日巳刻各軍先攻煖水口礮臺守臺匪黨併力抗拒正酣戰閒忽礮臺內煙燄蔽天知方鼇等已經攻入方耀與鄧安邦等率親軍向前奮擊逆勢不支由後衝出傷斃甚多遂將煖水口礮臺盡行平毀賊向上坪狂奔方耀等分路追剿槍斃及墜澗死者不計其數是

夜四鼓該逆放火燒上坪山寨分股逃向江省  
龍南縣屬之楊村白沙初十日復竄至和平縣  
屬大利壩查該處均屬江粵邊境逆匪自知窮  
蹙志在逃死有隙可乘卽隨時奔突冀延喘息  
現在席寶田婁雲慶王開琳等軍分紮龍定信  
豐一帶劉典李耀南等軍進紮南雄始興境內  
江防林立逆蹤諒難竄出臣等惟有嚴飭方耀

等會同高連陞趕緊截擊總期就地撲滅以杜蔓延

同日劉坤一奏言臬司席寶田率精銳營於十月十二日馳抵定南提督周寬世等率各營繼至探知逆衆已竄和平之下車地方十三日王開琳進扼天花等處該逆旋竄龍川之小山墟王開琳追至下車捕斬落後賊數十人該逆遂

由粵境繞道而走十七日竄龍川之白泥田十八日竄興甯之羅浮司十九日向平遠鎮平長驅而去並據謀報已竄福建武平席寶田一軍因恐尾追不及卽日拔赴會昌臣復檄調總兵劉勝祥等營前往並令總兵婁雲慶進紮安遠而留王開琳周寬世兩軍暫屯長甯杜賊回竄惟查閩省健將精兵均已赴粵邊防頗單現在

幫辦福建軍務劉典署浙江提督黃少春雖帶  
所部星馳回閩能否繞出賊前難以計料萬一  
該逆自武平犯汀州則江西甯都州屬在在可  
虞再由汀州走邵武則撫建廣饒更有防不勝  
防之勢並可由江閩交界山內直趨浙之三衢  
以入皖南一經滋蔓勢又燎原極爲可慮適浙  
江提督鮑超於二十三日抵贛臣當與面商卽

率新募生力之兵於本月二十八日起程馳赴  
婁雲慶行營察看事勢如賊尙在武平等處當  
舉全軍迎擊或出汀州會同福建藩司王德榜  
一軍併力邀賊如賊已至汀州則該提督取道  
建昌府屬之新城縣出杉關至邵武一帶扼賊  
去路屏蔽浙皖席寶田等各軍循贛甯而東以  
衛江西腹地相機出境與鮑超等前後夾攻仍

聽閩浙督臣左宗棠節制調遣贛郡防務責成  
道員王文瑞妥辦臣率親兵馳回省城就近籌  
防省東各郡事宜以重根本

劉坤一又奏言再查席寶田補授貴州臬司自  
應卽赴新任惟該員現帶精毅營勇最爲江省  
得力之師現值逆衆擾及閩省分派各營出境  
拏剿沿邊設防戰事方殷席寶田實難遽去合

無仰懇

天恩俯准將席寶田暫行留營俟此股髮逆撲滅後  
再飭赴任均奏入

上命軍機大臣傳諭左宗棠瑞麟劉坤一徐宗幹郭  
嵩燾曰逆蹤剽疾旬餘之內已竄擾三省邊境倏  
忽東趨江粵各軍並未大加懲創扼其奔突何能  
制賊死命劉典黃少春兩軍現率所部星馳回閩

席寶田劉勝祥等軍復馳赴會昌扼剿著左宗棠  
劉坤一迅卽檄飭各軍繞出賊前迎頭截擊不得  
徒事尾追致令著著落後並著瑞麟郭嵩燾飛飭  
李福泰方耀等緊躡賊蹤實力追剿不准以驅賊  
出境爲了事鮑超現已抵贛卽著迅由安遠一路  
覘賊所向扼其去路毋任蔓延賊蹤已近閩邊左  
宗棠有節制三省之責務當一面嚴飭沿邊將士

扼防本境杜其深入一面將江閩粵各路官軍妥  
籌調遣總期四面兜圍爲一鼓聚殲之計其江粵  
各軍更不得藉口本省邊防徒事株守致令賊勢  
縱橫驟難藏事席寶田現飭精銳等營勦賊戰事  
方殷著准其暫行留營俟此股髮逆撲滅卽行馳  
赴貴州臬司新任

十九日

庚辰

左宗棠奏言滇逆汪海洋一股由江

西定南敗竄廣東連平所轄上下坪一帶時遣  
賊黨擾及龍南始興邊境意在由南韶奪路竄  
江西湖南邊界劉典全軍由南康進駐廣東南  
雄高連陞一軍由河源進駐長甯扼賊內犯廣  
東之路黃少春一軍由贛州進駐信豐扼賊旁  
竄江西之路賊知去路已斷忽由連平翻山繞  
竄和平興甯各境所過城邑皆繞道急趨突犯

嘉應聞州城已於十月二十一日失守旬日之間狂竄數百里將由閩邊以犯江西閩軍悉數入江入粵原爲截賊去路去閩日遠此次逆賊乘虛回竄一無阻遏閩軍爲賊所隔回剿不能迅速已在意中查嘉應入閩約有三道一入永定一由鎮平入武平一由大埔入平和均不過百數十里而永定尤爲衝要臣現飭賴長率所

部勇丁一千嚴扼之復檄藩司王德榜速率所  
部二千五百人由汀州拔營馳往截剿飛調黃  
少春由江西信豐過安遠以扼武平並咨劉坤  
一嚴扼會昌瑞平臣擬卽日率親兵八百人並  
調總兵楊和貴一營出屯琯溪以扼漳州之衝  
而兼顧平和一路俟各軍到齊再行前進督剿  
如賊竄江西臣自當遵

旨赴江西視賊所向會同江西撫臣檄飭各軍相機  
妥辦奏入

上命軍機大臣傳諭左宗棠瑞麟劉坤一郭嵩燾曰  
該匪旬日之間狂竄數百里其欲由閩邊以犯江  
西已可概見著左宗棠檄飭派出各軍將由嘉應  
入閩之路分投堵截遇賊卽擊以剿爲防務將此  
股賊匪迅速掃除肅清疆圉以竟全功該逆既有

圖竄江西之勢亟應實力嚴防以扼其紛擾之路  
著劉坤一督飭防軍認真堵禦並嚴扼會昌瑞金  
一帶與汀州鎮沈俊德一軍聯絡聲援會籌勦洗  
爲一鼓聚殲之計嘉應州城被陷著瑞麟郭嵩燾  
將失事情形並文武下落查明具奏並著嚴飭卓  
興方耀等軍迅圖克復州城一面將此股竄匪痛  
加勦洗就地殄滅毋令再竄福建江西等省又成

不了之局平和一路兵力較單該督擬出屯琯溪以扼漳州之衝兼顧平和一路卽著移營前進相機布置如賊竄江西並著左宗棠擇要駐紮會同劉坤一督飭各軍視賊所向力圖埽蕩

二十日辛巳劉坤一奏言汪海洋股匪偵知福建

武平駐有防兵折向嘉應於十月二十一日襲陷州城臣查汪逆於敗殘之後猶敢占踞城池

實屬兇狡已極該逆若乘閩師未經厚集衝過汀邵橫出撫建則地方平行路徑紛歧我軍轉難兜剿今該逆聚處一城三省官軍連營而進四面深溝高壘必可悉數殄除惟是嘉應民情犷悍異常匪徒充斥卽江閩邊境伏莽亦多若任該逆出沒往來脅誘各處村寨誠恐蟻附日衆其勢益張宜急束之於嘉應城中使之坐困

庶可制其死命則合圍未可稍緩也就合圍而論江軍出會昌長甯取道平遠以偏嘉應州城之北而不能兼顧東西一路防範稍鬆賊或乘隙而遁東竄汀郡則江省之撫建堪虞西走惠韶卽江省之賴南受敵回軍轉鬪勢必後期是欲救鄰省之災而轉貽本省之患必須三省官軍同時壓境庶免橫溢旁流閩師當力任東面

粵師當力任西面與南面各據形勝互爲聲援  
使賊無瑕可蹈方能聚而殲旃則進兵不容參  
差也顧進兵以後則愈去愈遙旣抵嘉應州城  
離江西邊境數百里軍情瞬息千變臣已遙制  
爲難況與閩粵之師彼此不相節制或前或卻  
不免坐失事機必得威望素著重臣就近爲之  
提挈庶攻守不至失策則督辦必在得人也臣

現在各行浙江提督鮑超一軍及貴州臬司席  
寶田一軍並候補總兵劉勝祥一軍共計近三  
萬人簡卒嚴裝分途出境仰懇

天恩飭催閩浙督

臣

左宗棠迅速赴粵調度俾將領

有所稟承至提督周寬世總兵王開琳道員張  
岳齡所部各營仍分駐會昌長甯以固邊防而  
作後勁其藩司劉連捷總兵朱鴻章兩軍應暫

留駐南安原處以備不虞奏入

上諭曰據奏賊竄嘉應情形與昨日左宗棠奏報相同當經寄諭該督相機擇要扼紮矣卽著劉坤一懷遵昨日寄諭督飭防軍認真堵禦並嚴扼會昌瑞金一帶與汀軍聯絡會剿所派鮑超席寶田劉勝祥等軍卽著飭令迅速分途出境協擊並咨會左宗棠就近調遣

二十六日

丁亥

瑞麟郭嵩燾奏言滇逆汪海洋自

大利壩抵興隆壩窺犯和平十月十一日逆黨  
數千徑撲東南北三門總兵劉清亮等分路出  
城夾擊賊紛紛倒退殲斃甚多當將興隆壩一  
帶賊壘全行平毀該逆恐大兵追及一晝夜疾  
走三百里自赫布岡突抵嘉應州城二十一日  
賊率馬步死黨攜帶竹梯四面撲城城上施放

大礮斃賊無數賊拌死直抵城根屢墮屢登援  
梯蟻附而上兵勇力竭遂被闖入署知州程培  
霖督勇巷戰受傷倒地團勇將其掖出其餘文  
武各官不知下落現在方耀鄧安邦等已進紮  
嘉應州屬卽日約齊合攻臣等查汪海洋潰敗  
之餘逆燄已衰有隙卽乘志在逃死論目前事  
勢不患賊之屯聚而患其輕竄聚則可殲於一

隅竄則恐延及四境粵兵防多力分卓興一軍  
因欠餉過鉅已於九月間裁撤回潮東路祇有  
方耀等與提臣高連陞劉清亮康國器數軍事  
事追勦高連陞等已趕抵興甯力圖會攻而各  
營皆疾疫過多日馳逐於山嵐谿瘴中每行百  
十里曠無人煙糧食俱斷飢病交侵情形實多  
拮据嘉應東接潮州可以順流徑下西界惠郡

東北則江閩邊境均屬犬牙交錯在在可通儘  
被逆匪竄出蔓延辦理更形棘手昨接左宗棠  
咨稱卽日起程赴粵居中調度臣等一面飛飭  
李福泰移紮龍川控扼惠韶門戶飭張銑與總  
兵翟國彥等多募勁勇固守全潮調鄭紹忠督  
帶全隊由南雄馳赴東江以厚兵力一面移會  
劉坤一飭令邊防一二軍越境會辦署嘉應州

知州程培霖身任地方被匪闖入實屬疏於防範惟因倉猝賊至衆寡不敵且巷戰踰時身受槍傷經百姓救出號召鄉團亟圖克復合無仰懇

天恩免其治罪仍革職留營效力以贖前愆奏入

上命軍機大臣傳諭左宗棠瑞麟劉坤一郭嵩燾曰該逆由蘇布岡突抵嘉應州城兵勇力竭致被闖

八現在方耀鄧安邦等軍已進紮嘉應州屬卽著  
飭令約會各軍同時進取並著督飭李福泰張銑  
翟國彥鄧紹忠等屯紮要隘力籌堵剿至卓興一  
軍因欠餉過鉅裁撤回潮不知瑞麟郭嵩燾平日  
所籌畫者何事此時方耀等軍剿賊正當契緊該  
督撫等務當寬籌餉項源源接濟毋得再有貽誤  
左宗棠如能迅速赴粵督剿不特調度靈通且可

堵賊入閩之路於大局最有裨益該督素稱知兵想必能通盤擘畫蕩定賊氛也賊匪聚於一隅利在會剿著劉坤一督飭防軍認真堵禦並酌派勁旅越境會合閩粵之軍四面圍攻迅圖剿洗署知州程培霖疏於防範咎無可辭惟因倉猝賊至寡不敵且巷戰踰時身受槍傷情尚可原著加恩免其治罪仍革職留營效力以贖前愆

二十九日

庚寅

鮑超奏言凍逆竄踞嘉應州城並

分股在城外四五十里一帶擄掠盤踞悍賊猶復不少非三省實力合剿未易撲滅至進兵以會昌爲後路會昌通贛河水運便於轉輸臣於十一月十二日移紮會昌至由會昌達嘉應三百餘里江粵交界山路崎嶇不通水道轉運爲難臣一面函商劉坤一瑞麟郭嵩燾轉飭就近

地方官設法轉運藉資軍食並函商左宗棠暨  
江粵各帶兵大員剋期會剿務殄餘氛惟辦理  
軍務貴因時變通從前賊勢蔓延自應分防以  
固門戶今汪逆雖悍孤注無援合三省兵力不  
下百十餘營若處處分防實形單弱況賊蹤靡  
定東防西竄顧此失彼轉有防不勝防之勢不  
如以剿爲防或少防多剿會合各軍直逼賊壘

爲得地勢儼該逆勢蹙負固即可四面堯圍空  
濠增壘俾濫獸釜魚一律殲除至各軍越境會  
勦利固百倍弊亦無窮未進之先各存意見臨  
敵之際牽制堪虞勝則爭功敗則諉過窒礙多  
端難逃

聖鑒非督師大臣親臨前敵目覩實情驅策羣力恐  
不免耽延時日虛糜軍餉臣自奉浙閩督臣左

宗棠節制之

命到江西後屢次函請其指授方略乃於途次疊接  
咨函均以賊蹤千變勢遠不能遙制爲辭意涉  
謙遜臣暨各軍靜候調遣無所適從深懼貽誤  
事機可否催令左宗棠仍遵入粵前

旨迅臨前敵督飭諸路謀定而戰合力進攻俾事權  
歸一藉收指臂之效奏入

上命軍機大臣傳諭左宗棠鮑超曰髮逆大股盤踞  
嘉應州城非合三省兵四面圍鐵勢將復行滋蔓  
尤須有督兵大員節制調度方足以一號令而齊  
進止現據鮑超奏稱各軍越境會勦未進之先各  
存意見臨敵之際牽制堪虞爭功誘過窒礙多端  
非督師大臣親臨前敵驅策羣力不免耽延時日  
虛糜軍餉等語該提督老於戎行洞悉軍情利弊

所奏深合機宜左宗棠前辭節制三省之命朝廷  
未經允准疊經諭令視賊所向馳赴江粵督兵會  
勦該督旋因賊陷嘉應奏明帶兵赴粵督勦著卽  
調齊江閩粵三省官軍四路進徧務乘賊勢窮蹙  
之餘就地殲除不可再令賊蹤他竄又成燎原之  
勢並著該督親往嘉應視師以期呼應靈通鮑超  
所部現已會齊駐紮會昌聽候左宗棠調遣著該

督卽約會閩粵各軍訂期前進並檄令鮑超所部  
合力進攻毋得稍分畛域坐失機宜所有鮑超軍  
營糧餉卽著該提督行知廣東江西各督撫嚴檄  
地方官設法轉運毋許貽誤前經諭令曾國藩將  
鮑超一軍酌調赴豫勦辦捻匪現當江粵軍務喫  
緊之時鮑超駐軍會昌距嘉應甚近卽著該提督  
暫緩赴豫俟髮逆蕩平後再行聽候曾國藩檄調

八豫助剿擒匪

上又命軍機大臣傳諭曾國藩曰前據曾國藩奏鮑超一軍赴豫有益當經諭令曾國藩酌量檄調本日據鮑超奏稱馳抵江粵邊界已於本月十二日移紮會昌現聞溘逆大股盤踞嘉應州城擬卽由會昌前往嘉應會剿等語髮逆竄擾粵東勢尙猖獗鮑超就近由江赴粵剿辦此股必能得手此時

若將該軍改調赴豫則舍近圖遠往返又需時日  
疲於奔走殊失機宜就目下軍情揆其緩急莫若  
卽將鮑超一軍暫留江粵勦辦此股髮逆以期迅  
速蕺事所有鮑超一軍卽著該大臣暫緩檄調俟  
髮逆勦平後再行飭令赴豫助勦

十二月初一日

壬辰

官文鄭敦謹奏言據探賊匪

大股竄至光羅一帶相距黃麻不遠成大吉一

軍已移紮小河溪黃麻一路甚屬空虛而賊勢  
忽分忽合奔竄無定襄陽係屬西路姜譚等軍  
駐紮進逼賊之大勢業已東趨情形較爲喫緊  
擬請

旨飭令鮑超卽就近取道黃麻迎頭截擊直搗中堅  
以寒賊膽其餘各路卽令楚豫各軍四面兜剿  
同日曾國藩奏言臣接官文來函鮑超必欲統

帶多兵鄂省實難供應又接李鴻章來函粵中賊氛尙熾汪逆悍黨數萬人以一隅遙爲牽掣致數省不得解嚴須留鮑超在江方足支撐又聞汪逆近已竄陷嘉應州窺伺閩汀臣思目下鮑超一軍已由贛州進兵暫難更調應俟江粵全境肅清再檄該軍勦捻庶不至往返僕僕顧此失彼均奏入

上命軍機大臣傳諭官文曾國藩曰汪逆竄踞嘉應  
州城昨據鮑超馳奏業由會昌赴粵勦辦當經諭  
令曾國藩暫緩檄調著俟該提督將竄粵髮逆勦  
平後再行調赴豫省助勦以免往返奔馳鮑超一  
軍急切不能到豫官文急須另籌兵力扼紮黃麻  
豈可專待此軍致滋貽誤

初二日 癸巳 李瀚章奏言溘逆汪海洋盤踞上坪

之時路通始興仁化東路諸軍嚴陣備戰嗣據探報賊已竄往鎮平嘉應武平永定查濶逆頻爲江閩各軍所敗自八月以來豕突狼奔初無定向賴南南雄各界官軍密布賊不得逞乃復折而東走惟由和平龍川興甯平遠鎮平以至武平永定卽從前由閩擾粵之熟徑往來倏忽遠則爲廣饒衢嚴之患近仍是江楚南境之憂

劉典黃少春之軍均已回顧閩疆江西撫臣劉  
坤一布置顧防並令鮑超越境會合閩軍攔剿  
該逆如不得逞勢必西回未可以賊去稍遠遂  
弛邊防臣仍飭臬司趙煥聯陳士杰總兵王永  
章等嚴密設備無少疏懈惟藩司劉連捷總兵  
朱南桂朱洪章三軍克復金陵後曾國藩本准  
凱撤本年因金口勇叛調至江西囑臣察看軍

情酌定裁遣此三軍勞勩日久現值逆蹤稍遠  
自當遂其休息臣咨商劉坤一陸續撤遣由湖  
南江西督銷淮鹽局補給欠餉咨會曾國藩轉  
飭糧臺覈算報銷奏入

上命軍機大臣傳諭李瀚章曰汪逆竄至粵東嘉應  
失陷雖距湘境稍遠惟該逆紛擾靡定仍恐窺伺  
江楚湖南邊境防務未可稍鬆著李瀚章督飭趙

煥聯等嚴密防範無稍疏虞劉連捷等軍勞勩日久卽著陸續裁撤俾資休息欠餉仍由湖南江西補給並著知照劉坤一妥爲辦理

初六日丁酉劉坤一奏言賊陷嘉應州城臣前經

奏明鮑超席寶田劉勝祥三軍分途出境會攻現准左宗棠來咨已催其次第啟行並委營務處補用道何應祺及贛南道王文瑞沿途設局

轉運米糧子藥俾免缺乏果能及時合圍可收聚殲之效查鮑超一軍已經左宗棠調赴武平上杭臣飭席寶田劉勝祥兩軍由平遠鎮平前進藉以屏蔽江西仍令湖南提督周寬世所統之銓字營三千餘人候補總兵王開琳所統之新老湘勇五千餘人候補道張岳齡所統之平江勇一千餘人駐守會長及龍定一帶與劉連

捷所統之副後等營四千餘人朱洪章所統之  
長勝等營一千餘人遙爲聯絡以固江省西路  
遠防卽以扼楚北門戶奏入

上諭曰賊在嘉應州距江省甚爲切近該撫已派席  
寶田等軍由平遠鎮平前進著卽飭令各軍剋日  
會剿盡殲醜類如江西邊界軍情緊急該撫仍當  
酌度情形出省督剿毋稍疏忽

初九日庚子左宗棠奏言臣自聞廣東嘉應州失

守卽率親兵及候補總兵楊和貴新右營出屯  
平和縣琯溪以固漳州南靖門戶遏賊內犯催  
調劉典全軍由廣東南雄州取道江西南安贛  
州入閩黃少春由南安贛州入閩而高連陞康  
國器劉清亮三軍皆隔在賊後無從檄調臣抵  
琯溪後詢知賊蹤尙未竄動江西各軍尙無出

境確信適奉

諭旨鮑超一軍仍歸臣節制臣卽咨令鮑超率所部  
新舊各營一萬二千人入閩分扼武平上杭劉  
興率所部勇丁八千餘名入閩後徑趨永定其  
黃少春一軍三千人王德榜一軍二千五百人  
檄令隨臣進剿旋據高連陞康國器緘報已尾  
賊而來由興甯向東北疾趨高連陞已紮嘉應

州東北三十里之葵嶺康國器已紮鎮平縣其  
嘉應州城之西三十里藍口地方間粵軍方耀  
鄧安邦駐紮其東南一面賴長所部一千人已  
進紮丙村對河之井塘與惠潮嘉道張銑所派  
勇丁三千餘名夾河而守四面布置嚴有規模  
臣現催鮑超由平遠東石徑趨嘉應西北相公  
亭一帶俟其到防再令扼要紮營延至藍口舍

坑一帶以扼其西其藍口現紮之粵軍俟鮑軍  
到防後當移紮對河之長沙墟一帶憑河而守  
與丙村諸軍聯絡以扼其南劉典一軍由武平  
上杭出松源一帶徑抵松口再與葵嶺高連陞  
及賴長之軍聯絡進扼其東與南高連陞旣進  
葵嶺康國器一軍應卽由鎮平出三圳新埠墟  
紫石峯徑東連高連陞軍西連鮑超軍以扼其

北賊知東西北三面無路可竄必於南路潮州  
及豐順揭陽一帶別覓生路而嘉應南濱支河  
至三河壩而後入汀州幹河以趨潮州故由嘉  
應以趨潮州水路之要在三河壩而由嘉應以  
趨揭陽則言嶺關實當其衝粵軍三千餘分扼  
兩處兵力尙單而帶勇之員弁一爲前署潮州  
黃岡協副將遊擊何雲章一爲五品軍功容朝

章臣慮其不足深恃一面飭其深溝固壘嚴斷  
接濟一面飛咨廣東督撫飭局趕籌製造礮船  
以扼水路復飭賴長於三河壩上游一帶河道  
水淺處密釘木椿深處雇船配槍礮手扼之暫  
濟目前之急飭潮州鎮翟國彥及惠潮嘉道張  
銑嚴備城守臣卽率所部由平和出大埔繞三  
河壩趨松口將水路形勢察看明白然後折而

北趨駐營嘉應州北路將東西兩路各軍分勻  
派紮漸偏漸進迫地近兵多足敷防勦則分兵  
過河繞紮南路而四面鎖圍之勢可成矣現在  
署浙江提督黃少春已抵臣營劉典全軍已抵  
武平上杭可以漸次聯絡齊進惟鮑超一軍尙  
未得其行抵何處信息臣已四次飛催此軍入  
粵以後人地生疏必須廣東設立米局始免缺

乏臣已咨請廣東督撫臣委員辦理其月餉由  
江西籌解伏乞

皇上天恩飭下江西撫

臣

力籌按月接濟不致如從

前新湘長左等營一入閩境卽推置不顧方於  
大局有益

左宗棠又奏旨查李福泰於粵東兵事向未兼  
稟臣無從測其虛實不敢妄有論列惟賊由連

平上下坪竄走嘉應時李福泰覲然報攻克追  
勦之功實則並無其事卽此以觀則李福泰專  
務粉飾可知奏入

上命軍機大臣傳諭左宗棠瑞麟劉坤一郭嵩燾鮑  
超曰汪逆大股竄踞嘉應州城著左宗棠卽日入  
粵調度各軍聯絡聲勢務將汪逆全股及土匪叛  
勇盡數殄除勿任再行出竄鮑超一軍前已據奏

行抵會昌著該提督卽進兵嘉應會勦聽左宗棠  
調遣左宗棠有節制三省之責著於入粵後妥籌  
調度如江粵各省之兵有疲沓不能得力貽誤事  
機者卽由該督嚴叅治罪瑞麟郭嵩燾卽飭方耀  
等軍歸左宗棠節制與江閩諸軍聯爲一氣並檄  
惠潮等郡文武員弁妥籌守禦以防該逆旁竄所  
需礮船卽飭局趕造以遏水路要衝鮑超一軍入

粵人地生疏著劉坤一按月籌餉解濟瑞麟等派  
令妥員設立米局均須寬爲籌備毋任缺乏劉坤  
一仍當懷遵疊次諭旨催軍出境合剿不得稍存  
畛域之見左宗棠另片奏李福泰於賊由連平上  
下坪竄走嘉應時覲然報攻克追剿之功實在並  
無其事實屬粉飾廣東布政使李福泰著先行交  
部議處並著左宗棠察看如始終不能得力卽另

揀妥員統帶將該藩司撤回恭辦

左宗棠又奏言臣既遵

旨節制廣東江西軍務現在賊踞嘉應州臣自應入

粵督勦現擬帶印出境所有臣署日行事件仍

照例委藩司代拆代行其尋常題咨事件臣既

出境尤難兼顧應卽咨請撫臣徐宗幹代辦奏

入報

聞

二十五日

丙辰

瑞麟郭嵩燾奏旨逆匪竄陷嘉應

四處擄搶屯聚州城又於城外四面建立土城  
望臺暫圖偷生之計官兵稍集必將乘閒旁竄  
滋擾惠潮嘉一帶伏莽繁多又近年降人散勇  
甚衆乘勢附從隱憂方劇節次檄調候補總兵  
曾敏行署羅定協副將鄭紹忠扼防南路已據

曾敏行一軍進紮水車林保梁仕光兩軍副之  
鄭紹忠一軍已抵興甯現令趕緊到防江閩各  
軍環集東北提督高連陞總兵劉清亮兩軍已  
由新鋪白渡一帶進紮葵嶺延建邵道康國器  
進紮鎮平之三圳墟總兵王開琳前抵丙村與  
潮州遊擊何雲章三河壩各軍相爲犄角劉典  
一軍分紮武平上杭爲北路後勁署浙江提督

黃少春福建藩司王開榜隨同左宗棠進剿又  
爲東路後勁其東南三河壩水路又飭由惠潮  
嘉道張銑等添募巡船二十號以資防堵西北  
一路平遠相公亭大坪石正一帶可以橫竄江  
西之長甯又可由平遠北竄龍定西出南雄始  
興以窺楚境此路專候鮑超一軍進紮臣等查  
粵軍星羅碁布不可無統帶之員歸併整頓聽

候左宗棠調遣臣嵩燾擬卽馳赴各營相度形勢以圖扼守已檄飭肇慶協副將楊青山馳赴廉州招集馮子材舊部三千人分立選勝軍六營由該副將統帶候鮑超一軍進紮相公亭卽調駐防始興之知府銜曾紀鳳一軍陽江鎮任星元一軍隨同臣嵩燾進剿一俟兩軍咸集臣嵩燾卽由惠州馳赴言嶺關及興長一帶擇要

扼紮就近與左宗棠商議進止機宜至鮑超一  
軍萬二千人日需食米臣等前聞鮑超入粵之  
信已飭軍需局籌解銀一萬兩由龍川一路向  
前迎護兼爲採辦食米之計所行多山谷小徑  
不通江路又屢遭兵燹商旅無至者各處村莊  
頑獷戕法公行劫掠不獨經費難籌亦且求一  
完善地方設立轉運局而不可得惟當竭力籌

維務使此軍食米不憂缺乏以資合圍掃蕩之  
力嗣後一切軍情由左宗棠主稿會銜馳奏奏  
八

上命軍機大臣傳諭左宗棠瑞麟劉坤一郭嵩燾曰  
汪逆竄踞嘉應於城外四面建立土城望臺負嵎  
抗拒瑞麟郭嵩燾現飭曾敏行等軍分紮各路杜  
賊紛竄著卽檄飭各軍會同江閩官軍通力合作

步步爲營實力進剿爲四面合圍之計毋令乘閒竄出復肆蔓延郭嵩燾現擬馳赴各營相度地勢以圖扼守卽著由惠州前赴言嶺關及興長一帶擇要駐紮就近與閩省官軍力籌進剿以期聚而殲旃西北一路平遠相公亭大坪石正一帶可以橫竄江西之長甯又可由平遠北竄龍定西出南雄始興以窺楚境必須勁旅扼守以防該逆紛竄

之路著左宗棠等催令鮑超星速進紮相公亭等處嚴密布置遇賊卽擊迅殄逆氛各營需用軍火及鮑超一軍食米著瑞麟郭嵩燾竭力籌辦妥爲接濟左宗棠有節制三省之責嗣後一切軍情著左宗棠主稿會銜具奏劉坤一著懍遵疊次諭旨迅派官軍出境會剿毋分畛域

欽定剿平粵匪方略卷四百十四 丙寅年

五年正月初二日 壬戌劉坤一奏言賊匪自竄陷

嘉應州城勢益猖獗自應併力會剿以期悉數  
殄除江西各營除鮑超一軍外惟席寶田一軍  
萬餘人爲最精臣復以總兵劉勝祥三千餘人  
隸之其力益厚頃據先後咨稟均遵左宗棠調  
遣鮑超一軍於十二月初六七等日以次前進

廣東平遠縣之相公亭席寶田劉勝祥兩軍於  
初九十等日以次前進平遠縣之東石大柘從  
此漸偏漸近當可剋期合圍惟是濂逆狡悍異  
常誠恐伺閒先竄嘉應拒江西僅二百四十餘  
里不可不豫爲之備南安祇有總兵朱洪章一  
千五百餘人兵力甚單臣已咨商提督周寬世  
及總兵王開琳移紮定南聽之鵝公墟兼顧西

路其道員張岳齡一軍留駐東路之會昌縣城  
且屬鮑超席寶田劉勝祥三軍覘賊所向馳往  
邀擊藉以屏蔽江西令道員何應祺於長甯縣  
督辦轉運並以照料邊防臣仍當酌度情形出  
省督辦以期埽蕩餘氛捍衛疆圉奏入

上諭曰所籌均合機宜仍著遵照前旨迅速出省督  
率席寶田等軍會攻嘉應迅克堅城以清餘孽

初八日戊辰左宗棠奏言官軍漸徧嘉應經臣籌

調提督鮑超等軍分路進剿十一月二十四日  
提督高連陞總兵劉清亮由樟樹坪進紮葵嶺  
前之鳳寨汪逆悍黨領巢而出設伏黃竹洋雙  
板橋一帶劉清亮甫將築壘賊卽屬至賊騎四  
五百直前衝突高連陞督各營四路迎敵遊擊  
朱體盛當先陷陣斬騎馬賊目二人中槍陣亡

副將張志公等向前接戰賊悉銳分撲我軍亦  
分路齊進縱橫盪決鏖戰四時之久約斃悍賊  
數百名賊始潰走我軍追至雙板橋始行收隊  
方高連陞分兵接戰時劉清亮見賊大至勢難  
分紮營壘因各列陣以待俟賊逼近排槍轟之  
賊復分兩路抄出遊擊李世祥等奮力迎敵斃  
賊多名賊來愈衆參將陳武職遊擊孫永忠均

受重傷猶裹創力戰將賊擊動汪逆見我軍再  
厲嗾悍賊數千直前衝突我軍閒有傷亡劉清  
亮與總兵李運榮下馬奮擊斃賊無算賊不能  
支亦從雙板橋遁去劉清亮與高連陞合隊追  
殺賊衆敗走遂收隊回樟樹坪老營是日道員  
康國器一軍進紮州城北之烏泥坪二十七日  
賊衆復出圖撲官軍營壘旋被擊回其藍口之

粵軍方耀營盤十六日夜被賊掩襲小挫西洋  
白宮市之粵軍何雲泰軍功容朝泰三營十一  
日遇賊敗潰容朝泰陣亡何雲泰退回丙村臣  
卽飭道員朱明亮帶所部由大埔馳至三河壩  
扼賊犯潮郡之路二十九日臣進大埔適幫辦  
軍務劉典由永定馳至臣卽商請飭其前隊由  
松口進州城東南之丙村並檄福建布政使王

德榜向塔子坳扼正東佛子高賊來之路與劉  
典井塘丙村之營相接提督黃少春向金谷坑  
扼東北葵嶺賊來之路與高連陞樟樹坪之營  
相接高連陞樟樹坪之營與康國器烏泥坪之  
營相距不過十里亦可互相聯絡是嘉應州城  
東路北路及東南東北路長圍漸成然猶去賊  
二三十里也其所以不近逼者以州城西北之

相公亭大坪兩路急盼鮑超全軍及江西席寶  
田劉勝祥兩軍前來扼紮庶可杜其北竄平遠  
西竄興甯之路師行山谷之間購米極艱臣疊  
次飛咨廣東督撫臣委員設局廣爲採辦並咨  
江西撫臣速籌餉銀三萬兩委員赴粵爲席寶  
田劉勝祥採辦軍米臣亦勻撥閩餉一萬六千  
兩爲鮑超採辦軍米如鮑超等軍日內馳至臣

當率親兵及總兵楊和貴新右營由東南松口繞至東北一路親歷各營共商分布長圍之策一俟各路取齊剋期並進東西北三面偪緊賊必從西南及南面衝竄臣已飛調粵軍總兵鄭紹忠帶所部先扼長河墟如西路江軍延紮而南則粵軍方耀鄧安邦萬餘人可由藍口至畚坑長河墟進紮而東閩軍可由丙村進紮而西

互相聯絡四面鎖圍其嘉應通汀潮之梅江賊  
已先據民船希圖下竄潮郡臣前飛咨粵東督  
撫趕緊造船配礮並飭道員張銑趕調八槳礮  
船數十號交粵將黃聯開管帶以扼三河壩與  
朱明亮陸路之兵緊相依護全局布置周密可  
望聚殲此次陣亡之知縣汪遇元等相應開列  
仰懇

飭部分別議卹奏入

上命軍機大臣傳諭左宗棠瑞麟徐宗幹劉坤一郭  
嵩燾曰汪逆盤踞嘉應左宗棠籌調各軍分路進  
剿高連陞等於雙板橋一帶血戰數時雖將賊擊  
退而哨弁傷亡不少粵軍復被賊掩襲失去營壘  
是賊勢雖蹙而兇焰頗張該督現進大埔分布劉  
興王德榜黃少春高連陞康國器等軍互相聯絡

長圍之勢漸成正可力圖進取昨據劉坤一奏鮑超已於十二月初六七以次前進平遠之相公亭席寶田劉勝祥兩軍於初九十以次前進東石大柘兩路官軍計日業已到防自可扼其北竄平遠西竄興甯之路著左宗棠督飭各軍剋期齊進合力兜圍以收聚殲之效並著瑞麟郭嵩燾檄令鄭紹忠方耀等軍與江閩之兵聯絡布置儘粵省帶

兵員弁不能得力卽由左宗棠嚴叅治罪鮑超及  
江西客軍入粵瑞麟等務須設局寬爲採辦軍米  
以期無誤兵食劉坤一迅遵前旨出省督飭各軍  
會攻一面嚴扼本境邊防毋稍疏懈賊見長圍勢  
合據船下竄潮郡必在意中左宗棠瑞麟等務當  
多備礮船飭令黃聯開朱明亮水陸各軍嚴備要  
隘毋令賊蹤倖脫又成不了之局此次陣亡之知

縣汪遇元縣丞晏際時都司劉永茂蕭勝文劉宣  
元王連斌趙玉林何文祿守備鄭秀章蕭煥武遊  
擊朱體盛都司錢桂仁守備鄭炳禮鍾洪霖千總  
鍾成魁遊擊鍾敏遂軍功客朝泰均著交部議卹

同日

上諭內閣曰浙江布政使蔣益澧著馳赴廣東辦理  
軍務兼籌軍餉

十五日乙亥左宗棠瑞麟郭嵩燾奏言凍逆汪海

洋知官軍漸次進紮屢率剽悍騎賊至州東佛

子高分水鄉曹塘一帶窺探地勢冀圖設伏衝

撲臣左宗棠商請劉典會同高連陞黃少春王

德榜前往塔子坳分水鄉等處察看形勢剋期

進紮並令細探曹塘小路以防該逆設伏包抄

十二月十二日五鼓黃少春各軍齊進塔子坳

分路扼紮汪逆先嗾悍黨夤夜由曹塘小路出  
指湖頂雙坑以抄橫徑一帶營盤之後自與胡  
瞎子等率悍賊數萬分四路竄擁而來勢極狻  
猖張福齊等分路迎勦自辰至未盪決數十合  
斃匪二三千名汪逆親率死黨力抗我軍再接  
再厲無不奮勇爭先適劉典親督官兵斜出迎  
擊見指湖頂伏賊抄出深坑與李耀南等疾駛

上嶺黃少春王德榜塔子坳營壘已成皆出隊  
夾擊槍礮環轟斃賊甚夥伏賊遂敗去我軍乘  
勢追殺斬馘不可勝數汪逆大股尙在前抵死  
撐拒經張福齊等揮兵痛勦該逆亦殊死鬪正  
酣戰聞簡桂林等下馬持矛衝陣賊衆勢如山  
頽我軍奮威衝殺賊屍枕藉追至佛子高始行  
收隊其雙板橋另有一支抄後之賊經高連陞

督親兵橫出分水鄉以斷賊後令魏光邴等由  
葵嶺翻山斜趨分水之右俟賊退攔截飭丁賢  
發等直向雙板橋迎勦高連陞督親兵從分水  
鄉山徑出賊不意開槍轟擊賊見歸路已斷遂  
大驚亂適劉典黃少春王德榜各軍亦合兵衝  
殺賊衆奪路潰奔魏光邴等橫出擊之賊衆自  
相踐踏高連陞從後追殺斃賊數百名生擒二

十九名雙板橋餘賊鼠竄回奔我軍沿途追殺  
轟斃不少據獲賊供首逆汪海洋被槍子從頭  
左偏穿出兩眉際立即墜馬昇回州城業已氣  
絕與各軍探報相符且各賊具稟赴營乞降者  
兩日之間已三四千人計是戰共斬悍賊數十  
名轟傷戮傷者無算墜崖死者約數百名生擒  
二百餘名現據賊中諜報賊黨因汪逆伏誅推

僞儲王譚體元爲首賊首如胡瞎子汪麻子黃矮子何明亮等皆踞紮城內人數尙多必須速合長圍俾飛走絕跡然後誅其桀悍宥其脅從勦撫兼施乃可蕲事臣宗棠卽率親兵及楊和貴營由松口前進檄高連陞由東北葵嶺進紮黃竹洋黃少春王德榜由正東分水鄉進駐佛子高延紮而北與高連陞黃竹洋之營相接鮑

超於十三日抵平遠日間可進紮相公亭已飭  
康國器俟鮑超營盤紮定卽會期列隊徑由烏  
泥坪進扼正北洋門岌要隘與鮑超高連陞聯  
絡咨商鮑超進紮西北平成鋪等處並催席寶  
田劉勝祥兩軍速進西北大坪堡飭朱明亮進  
紮井塘使劉典全軍得由正東趨東南之白宮  
市龍津橋進紮黃坑渡再進至芹菜洋自東南

隅至西北隅各軍密布則正南西南正西各路  
更宜防賊衝竄粵軍方耀等扼西面藍口一處  
前調粵軍鄭紹忠及曾敏行兩軍疊飭會同進  
紮西南之長少墟尙未卽進臣宗棠已飛檄督  
之飭其速紮以彌西南一隅罅隙更調新募八  
槳礮船駛抵南路水陸依護以成鎖圍此次尤  
爲出力之總兵簡桂林等謹先行開列仰懇

天恩獎敘其餘出力員弁可否由臣左宗棠存記彙案保獎陣亡之擬保副將陽命伸等並請

飭部分別議卹奏入

上命軍機大臣傳諭左宗棠瑞麟劉坤一郭嵩燾曰  
濊逆汪海洋知官軍漸次進紮率領全股悍賊猛  
力衝撲經劉典黃少春高連陞同心共濟謀勇兼  
資在事將士踴躍用命大獲勝仗殲除汪逆自應

乘賊勢新挫之時一鼓作氣聚而殲旃左宗棠現率親兵由松口前進飭令高連陞等軍分布各路四面兜剿布置甚合機宜卽著督飭各軍合力進偪嚴密堵剿其方耀鄧安邦鄭紹忠等軍並著瑞麟郭嵩燾飭令迅速進紮儻敢稍涉遲延致罅隙未彌被賊竄突必將該員等從重治罪鮑超已抵平遠著左宗棠調令進屯西北平成鋪一帶會師

勦賊並著劉坤一迅檄席寶田等軍由西北步步  
進兵務令四面合圍使此股殘寇飛走路窮盡行  
殄滅

上諭內閣曰逆首汪海洋盤踞嘉應州城經左宗棠  
調派諸軍分路進勦斃賊無數訊據獲賊供稱首  
逆汪海洋頭被槍傷墜馬氣絕實足以伸天討而  
快人心著左宗棠迅督各路官軍四面合圍將餘

黨速行殄盡毋留餘孽尤爲出力之總兵簡桂林  
著賞換鏗僧額巴圖魯名號張福齊著賞換達桑  
阿巴圖魯名號以上二員均著遇有閩浙總兵缺  
出提奏劉端冕著交軍機處記名遇有總兵缺出  
請旨簡放道員李耀南著賞加二品頂戴副將馬  
駿發著以總兵補用樂連生著賞給力勇巴圖魯  
名號並賞加總兵銜甘大有著賞給武勇巴圖魯

名號劉傳儀著賞給果勇巴圖魯名號高方吉著  
賞給效勇巴圖魯名號周玉堂著賞給協勇巴圖  
魯名號參將謝復雲宋成祥遊擊張佑廷均著以  
副將留於福建補用張佑廷並賞換花翎參將戴  
清輝鄒玉林杜登雲吳茂軒均著以副將留於閩  
浙遇缺卽補鄒正魁李銘新姚連陞均著賞加副  
將銜遊擊余宏亮著以參將留於閩浙卽補張金

榜黃復勝陳厚順均著以參將留於閩浙遇缺卽  
補都司蕭雅泗田向陽均著以參將仍留福建補  
用先換頂戴羅東城湯世成周繼世陳龍香均著  
以遊擊留於閩浙補用劉甫田著以遊擊仍留福  
建補用守備黃文光謝紅蛟均著以都司儘先補  
用余洪勝林三友秦添福江同恩陳殿立葉義秀  
均著以都司補用千總向明幹著以守備儘先補

用並賞加都司銜軍功鍾雲杰著以千總儘先拔  
補並賞戴藍翎宛乾元張興發均著以千總卽補  
並賞戴藍翎范振升著以千總卽補並賞加守備  
銜已革都司祝鑑嵩著開復原官並免繳捐復銀  
兩其餘在事出力員弁著由左宗棠存記彙案保  
獎陣亡之擬保副將陽命伸副將趙輝元均著照  
總兵例議卹副將銜參將周壽臣著照副將例議

卹都司歐隆勝施輝林章海輝均著照都司例議  
卹擬保守備蔡文蔚著照守備例議卹外委蔡名  
吉著照千總例議卹

二十三日

癸未

左宗棠瑞麟郭嵩燾奏言汪逆伏

誅後僞偕王譚體元代統其衆與胡瞎子等負  
隅死拒圍撲東路官軍營壘十二月十八十九  
等日高連陞黃少春王德榜各軍環偪州城東

北之黃竹洋佛子高曹塘一帶紮營劉典劉明  
燈簡桂林李耀南等進紮西洋市副將賴長水  
陸三營進紮龍津橋各軍搭造浮橋夾河並進  
鮑超全軍於十七日抵州西北三十里之相公  
亭十九二十兩日在平成鋪山子下築壘廣東  
官軍李福泰亦至州西藍口令方耀鄧安邦至  
古塘坪列隊與鮑超爲犄角之勢十九日該逆

率衆來撲粵軍方耀鄧安邦扼金雞石埭口賊  
分三路猛攻方耀等分投迎擊鏖戰四時斃賊  
百餘名二十日鮑超出隊譚逆復率悍黨分投  
來迎鮑超令唐仁廉等分三路進剿先將中路  
之賊擊退左右路賊黨尙蠢擁而來譚勝達等  
奮力猛擊斃賊甚衆左路賊匪亦潰曾成武等  
復將右路賊匪擊敗乘勢追殺婁雲慶等橫截

之賊益驚亂鮑超督各軍掩殺追至城下斃賊  
四千餘名生擒老賊二百餘名汪逆伏誅賊衆  
膽落又不得逞於西北臣宗棠料其必圖速竄  
飭令各軍迅速合圍自率親兵及楊和貴新右  
營前進二十三日行抵州東三十里之井塘據  
各軍稟報賊於二十二日夜間潛啟西南門由  
小密出黃砂嶂而遁胡瞎子當先譚逆及各賊

斷後時劉明燈等立率所部疾趨黃砂嶂一路  
追截該處羣峯峭削一徑縈紆爲嘉應出新田  
大田右至豐順左至潮州之間道賊以數萬之  
衆冒死出險急不得前劉明燈簡桂林賴長馳  
抵泮坑斬尾賊數百名生擒三十餘名追過小  
密遇鄭紹忠所部遂向黃砂嶂併力追擊復斃  
賊二千餘名生擒五百餘名高連陞等率隊入

東門搜勦餘賊僞佑將劉廷貴率三壘之賊赴黃少春軍前乞降另股千餘人赴劉典軍前乞降高連陞王德榜康國器各軍徑向黃砂嶂追勦鮑超督所部入城其過黃砂嶂之賊劉明燈等緣岸衝殺斬賊目二十餘名賊黨三千餘名生擒千餘名解散難民數千名高連陞劉清亮亦合兵縱擊斃賊極多直至分水坳劉明燈等

因將士夜半出隊窮追竟日飢疲特甚乃收隊  
回營高連陞等整隊急追二十四日黎明及賊  
於大田我兵奮勇掩殺又追二十餘里賊屍枕  
藉賊黨乞降者萬餘人高連陞受之搜斬叛勇  
頭目歐陽輝及逆首賴蘋新之母悍賊猶越嶺  
狂竄我軍四路搜殺又斃賊二千餘名高連陞  
劉清亮暫駐大田督隊搜捕餘賊丁賢發生擒

偽總統胡瞎子卽胡泳詳餘賊悉降始收隊回  
王德榜一軍由黃砂嶂左路追殺二十三日間  
及賊於北溪僞先鋒眉天義曹玉科鈞天義楊  
侍如會天福何玉青僞天將彭大貴馬有玉彭  
大元劉得勝等率衆跪馬前泣求免死王德榜  
受之約四萬人鮑超所部二十三四兩日由黃  
砂嶂左路追至北溪白沙壩何明亮黃矮子等

仍思抗拒唐仁廉等分路奮擊將賊截作數段  
屍橫徧地共斃賊八千餘名逆衆見四面被圍  
始羅拜求生當將二萬餘衆一律兜撿查出僞  
忠誠天將何明亮僞大佐將何明輝暨叛勇頭  
目黃矮子等二十餘名及大小頭目七百三十  
四名訊明悉在軍前正法全股蕩平臣宗棠自  
可無須馳赴潮郡卽在松口暫駐將降衆分別

辦理查各首逆譚體元被閩軍於黃砂嶂北槍  
傷墜馬落崖死胡瞎子爲高連陞所部生擒何  
明亮黃矮子爲鮑超所部擒斬汪麻子亦中槍  
殞命悉殲除無一漏網卽多年稽誅之積賊與  
近時投誠之叛勇本地從賊之土匪亦皆撲滅  
無遺此次尤爲出力之浙江提督一等子爵鮑  
超等謹先行開列懇

恩從優獎勵其餘出力各員弁並請由 臣宗棠查明  
擇尤彙案保獎傷亡陣亡之副將宋成祥等一  
併開列請

旨飭部分別議卹

左宗棠又奏言幫辦福建軍務二品頂戴劉典  
前在浙江按察使任內於同治二年九月十八  
日皖南軍次聞訃丁父憂時劉典帶兵獨當一

路奏請改爲署浙江按察使俟軍務稍定准其  
回籍治喪事畢赴浙仍領原部劉典於是年十  
月由浙江嚴州營次請假奔喪回籍經臣檄催  
募勇剿賊於三年四月由籍起程帶勇入江助  
剿旋奉

恩命幫辦江皖軍務轉戰數月江境肅清復奉

旨開缺仍以二品頂戴幫辦福建軍務該員盡瘁馳

驅忠勤卓著卒能殲除巨寇俾無遺種是劉典之功不可沒也劉典每與臣言及親喪未克終制私懷耿耿聲與淚俱臣察其至誠亦爲悽愴茲當大局戡定可否

賞給劉典三代一品封典俾慰孝思之處出自恩施

同日劉坤一奏言臬司席寶田總兵劉勝祥在

平遠東石大柘各率所部由良畚龍虎墟前進  
於四年十二月十九二十等日馳紮大坪堡鮑  
超於二十日由平遠之相公亭率師至距嘉應  
州城十餘里之平成鋪山子下一帶正在紮營  
逆衆分三路來犯鮑超當令提督唐仁廉等督  
率各營分路應之該逆漫山徧野而來猛撲我  
軍唐仁廉等以洋礮隊連環轟擊曾成武督率

蔡立成等大呼陷陣各手刃賊數人賊衆驚潰  
我軍正擬分途馳逐適雲慶等兩旁抄出截  
賊歸路賊益慌亂鮑超督催各軍縱橫掩殺追  
抵城根沿途賊屍枕藉共殺斃四千餘名生擒  
二百三十四名濂逆汪海洋於十二月十二日  
猛攻塔子坳等處營壘與閩軍苦鬪汪逆受傷  
回城至十三日夜斃命羣賊推僞偕王譚體元

爲首二十日復爲鮑超所挫衆心惶懼二十二  
日席寶田劉勝祥進紮分水鄉等處賊見諸軍  
日逼乃於二十二日夜竄去臣當咨行鮑超劉  
勝祥兩軍窮賊所之力圖掃蕩擬留席寶田一  
軍暫駐大坪堡以資兼顧並飭全字湘勇平江  
長勝等軍勤加偵探嚴行防堵均奏入

上命軍機大臣傳諭曾國藩左宗棠瑞麟劉坤一郭

嵩燾曰逆匪盤踞嘉應州城屢思衝突經左宗棠督飭江粵閩三省之軍面面兜剿遂使該逆無路可竄一鼓殲除深堪嘉尚惟投降之人爲數過多必須妥爲遣散分別安插方免後患閩粵地方向多土匪積年爲患亦應搜捕淨盡永絕根株並飭地方文武將應辦善後事宜認真妥辦毋稍大意所部各軍自應由左宗棠會同瑞麟郭嵩燾劉坤

一酌量分別遣留惟現在東南雖已肅清而捻匪竄擾北路楚豫等省到處戒嚴防剿正當喫緊鮑超一軍前本令其馳赴北路助剿此時粵賊業已辦結卽著左宗棠飭令統帶所部迅赴楚豫之交聽候會國藩調遣其江閩各路得力將弁兵勇有可調赴楚豫江皖助剿者並著會國藩迅速函商左宗棠等酌量調往以期厚集兵力早殄逆氛左

宗棠等仍當聽候曾國藩函商調派分別遣留不得先將得力諸軍概行遣撤

上諭內閣曰粵逆由福建竄江西入廣東復有叛勇合併爲一肆行兇悖各路將士踴躍用命一旬三捷將十餘年髮逆餘孽一鼓蕩平實足以伸天討而快人心閩浙總督左宗棠督辦軍務調度有方著賞戴雙眼花翎著兩廣總督廣州將軍瑞麟著

賞還花翎三品頂戴署廣東巡撫郭嵩燾著賞給  
二品頂戴江西巡撫劉坤一著賞給頭品頂戴浙  
江提督一等子爵鮑超著賞加一雲騎尉世職前  
浙江按察使劉典廣東提督高連陞均著賞給雲  
騎尉世職劉典並賞給三代一品封典記名提督  
婁雲慶著以提督遇缺儘先題奏仍交部從優議  
敘提督唐仁廉譚勝達曾成武黃少春福建布政

使王德榜均著賞穿黃馬褂總兵孫開華著交軍  
機處記名遇有提督總兵缺出請旨簡放鄧訓誥  
著以提督遇缺題奏提督蕭得龍著賞換博奇巴  
圖魯名號劉清亮著賞換西林巴圖魯名號李運  
勝著賞換法什尙阿巴圖魯名號總兵黎榮鈞著  
賞換愛星阿巴圖魯名號劉明燈著賞給斐凌阿  
巴圖魯名號簡桂林等六員均著賞加提督銜內

丁賢發並賞給伊勒達蒙額巴圖魯名號齊蘭禮  
著賞給該員三代二品封典馬駿發著賞給直勇  
巴圖魯名號方耀著開復革職處分副將龔占鼐  
等三員均著以總兵記名請旨簡放龔占鼐並賞  
加提督銜張再勝等四員均著以總兵補用張再  
勝並賞給彥勇巴圖魯名號賴光斗並賞給俊勇  
巴圖魯名號喻名揚並賞給銜勇巴圖魯名號涂

祖昌並賞給確勇巴圖魯名號賴長著賞換剛安  
巴圖魯名號並賞加總兵銜徐連陞等三員均著  
免補副將以總兵補用徐連陞並賞給勳勇巴圖  
魯名號江自康並賞給強勇巴圖魯名號易進春  
並賞給勤勇巴圖魯名號宋定元著賞給果勇巴  
圖魯名號陳集賢著賞給靖勇巴圖魯名號甘大  
有等四員均著賞加總兵銜黃北海著賞給傑勇

巴圖魯名號譚勝清著賞給信勇巴圖魯名號黃  
喜光著賞給鋒勇巴圖魯名號謝復雲著賞給資  
勇巴圖魯名號睦金城著賞給志勇巴圖魯名號  
鄒玉林著賞給安勇巴圖魯名號戴清輝著賞給  
佐勇巴圖魯名號杜登雲著賞給碩勇巴圖魯名  
號吳茂軒著賞給綽勇巴圖魯名號參將唐得勝  
著賞給勵勇巴圖魯名號柳玉清著賞給爽勇巴

圖魯名號葉善明著賞給制勇巴圖魯名號朱長  
林著賞給勝勇巴圖魯名號陳道亨著賞給彰勇  
巴圖魯名號戴榮陞著賞給敢勇巴圖魯名號鄧  
榮佳著免補參將以副將儘先補用並賞加總兵  
銜曾華國著以副將仍留福建儘先推補陳得林  
等三員均著以副將留於浙江儘先補用張介和  
等三員均著以副將仍留浙江補用黎東溪著以

副將留於福建補用姜南全著以副將改留廣東  
儘先補用蕭佑飛等四員均著以副將留於浙江  
補用張金榜等四員均著以副將仍留福建浙江  
補用遊擊張復順著以參將留於福建補用並賞  
加副將銜劉甫田著以參將仍留福建補用並賞  
加副將銜張逢春等四員均著以副將補用孫永  
忠等二員均著以參將留於福建補用都司彭惟

貴等五員均著以參將補用彭錫芝著以遊擊仍  
留福建儘先補用並賞換花翎趙煥弛著以遊擊  
儘先補用並賞加參將銜喻經魁著以遊擊補用  
並賞換花翎江同恩等三員均著以遊擊卽補守  
備吳起順等四員均著以遊擊卽補都司鄧安邦  
著賞加遊擊銜守備朱芳遂著以遊擊留於福建  
儘先補用桂順傳著以都司留於福建儘先推補

守備銜丁泰洋著以都司留於福建儘先補用並  
賞戴花翎千總宛乾元著以都司仍留福建儘先  
補用聶章壽等四員均著以都司卽補並賞換花  
翎把總黃承佐著以千總卽補軍功王蓋臣等三  
名均著以千總儘先拔補並賞加守備銜賞戴藍  
翎陳順和著以千總留於福建儘先補用並賞戴  
藍翎道員李耀南著賞給奮勇巴圖魯名號朱明

亮著賞給二品頂戴魏光邴著賞加鹽運使銜知  
縣丁華先著免補知縣以同知直隸州知州留於  
福建遇缺儘先補用從九品譚成章著以府經歷  
縣丞仍留浙江遇缺先補並賞加鹽提舉銜其餘  
在事出力各員弁著左宗棠查明擇尤彙案保獎  
因傷殞命之副將宋成祥著交部照副將陣亡例  
從優議卹陣亡之守備鍾福春守備銜千總章邦

俊千總余勝才把總蕭大春方惠林外委王與志  
軍功王錫坤王金玉查成巷顧洪平汪心田朱福  
才何福興謝光輝汪炳林李桂方李正洪傅松亭  
梁大發梁英階張有登葉得勝劉亮順黃謙益桂  
明東李振義何上交蕭連陞李國才周泰和朱進  
達呂士三溫同勝潘文盛黃榮富蔣崇祺陳德貴  
劉炳榮戴雙福杜善功千總李賢連均著交部從

優議卹擬保守備願惟奇著照擬保官階從優議卹

左宗棠又奏言正繕摺間高連陞將僞總統胡  
瞎子卽胡泳詳解送來營訊供年三十三歲安  
徽東流縣人咸豐三年九月在安慶被僞丞相  
賴蔭新擒至廬州厯隨賴蔭新楊秀青陳玉城  
石達開彭大瞬童容海陳炳汶汪海洋竄擾三

江兩湖閩廣各省地方攻陷瑞州吉安邵武東  
安和平各府縣兩陷杭州汀州瑞金等城同治  
二年隨汪海洋踞餘杭結爲死黨本年夏間在  
閩粵交界輾轉竄突被官軍擊敗奔竄鎮平復  
由大柘東石斜趨羅浮司至龍南旋由和平攻  
連平回紮上坪折回原路竄陷嘉應州城因官  
軍緊逼汪逆又死想衝粵軍營盤走黃砂嶂赴

潮州再尋生路二十二日夜首先開路走至北  
溪正擬紮營官軍追及因逃至長崑山坳旋被  
擒獲等語該逆與汪海洋在賊中最爲兇狡罪  
大惡極死有餘辜當卽凌遲處決以彰

天討而快人心奏入報

聞

二月初二日壬辰劉坤一奏言嘉應收復後該逆

遁向潮州府屬之豐順縣貴州臬司席寶田一  
軍馳赴興甯杜其旁逸鮑超等軍會同閩師竟  
日窮追及之於黃砂嶂斬獲無算僞偕王譚體  
元僞奉王黃十四死於亂軍之中其餘頭目胡  
泳詳等及溲逆奉逆妻子均爲我軍所擒招撫  
匪黨六萬餘人髮逆全股撲滅從此東南無虞  
風鶴臣惟有慎選廉明守令訓練綠營官兵務

遂民生而嚴武備以期長治久安目下江省甫  
經解嚴地方游勇甚衆擬暫留總兵劉勝祥道  
員張岳齡兩軍及提督孫昌國等礮船分布水  
陸藉資彈壓其鮑超一軍前經兩江督臣曾國  
藩湖廣督臣官文先後調赴湖北河南專辦擒  
匪此時擒匪尙在黃安一帶應否卽令鮑超移  
得勝之師以向鄂豫請

旨遵行席寶田一軍應俟稍爲休息卽飭赴黔剿匪  
總兵朱洪章一軍因出征日久欠餉過多業經  
湖南撫臣李瀚章裁汰此外如提督周寬世總  
兵王開琳兩軍臣卽以次撤遣惟各軍欠餉甚  
多臣與司道多方計議無論何項悉行湊放但  
使應撤各軍能早一日起程卽可節省一日經  
費至各將士經年轉戰力竭狂氛各官紳等籌

辦接濟經營防務均屬著有微勞可否准臣擇  
尤請獎之處出自

天恩奏入

上諭曰所陳將各軍分別遺留及籌補欠餉各事宜  
均著照所擬辦理鮑超一軍已有旨令左宗棠飭  
令統帶所部迅赴楚豫之交聽候曾國藩調遣江  
西出力將士人等准劉坤一擇尤保奏

十四日

甲辰

左宗棠奏言據福建延建邵道康國

器稟稱十二月二十三日追賊至豐順縣北白

水寨一帶擒斬無算生擒逆渠洪秀泉之婿偽

金王鍾英偽幼陪王譚標偽懷王周春之姪周

社幅偽朝將黃松偽佐將何淅勝黃蘇寶解營

經臣親訊明確軍前正法浙江提督鮑超續於

降人中盤獲首逆汪海洋養子汪長林偽王宗

汪起賢福建藩司王德榜續於降人中盤獲汪  
海洋之妻張氏訊明正法又獲僞列王李海青  
僞天將粟時之僞神將劉汶淅等賊目三百餘  
名粵軍副將鄭紹忠搜獲僞贊王賴阿養朝將  
劉必勝及悍賊一百九十六名粵軍副將鄧在  
倫等亦搜獲逆目王友才江德勝王亞剴等十  
數名均立予斬決此外兇惡素著者訊明從嚴

懲辦其老弱及被脅日淺者委弁遞送各原籍  
安插婦女幼孩雇海船解送閩浙由各原籍紳  
商留養轉覓其親屬領歸其壯丁五千餘多江  
西安徽湖北各省民人督派各營安插給以口  
食帶出粵境陸續資遣此次搜捕餘匪出力各  
員弁謹分別開列奏請獎敘臣頻年效力戎行  
未遑安處精力日減左手左足常患麻木酸楚

艱於乘騎昨由平和趨程入粵嶺路墜馬左腕  
疼痛益劇自念犬馬之齒甫五十又五不應衰  
憊至此惟不及早調治恐漸成偏枯之證擬於  
本月二十四日班師回閩由水路至潮州取道  
詔安以就坦易到閩後急爲調理如能速痊不  
敢乞假瀆陳

左宗棠又奏言僞奉王黃十四卽黃朋厚於上

年十二月初間密遣人赴劉典軍前乞降劉典  
許之仍飭覘汪逆動靜隨時稟知十二日之戰  
復能密約夥黨勿抗官軍自取誅戮指揮其衆  
棄械款營就撫是其歸誠在先於解散賊黨機  
宜頗資其力可否免罪並

賞給守備銜之處出自

天恩

左宗棠又奏言准署兩廣督臣瑞麟來咨以東  
路肅清催高連陞赴廣東陸路提督本任令其  
將部曲交各將領接管聽臣檄飭凱旋臣維高  
連陞一軍糧餉均歸閩浙糧臺給領廣東僅解  
過該軍餉銀四萬兩茲因軍務告竣督臣催高  
連陞赴任所部咨臣檄飭回閩其意不過以此  
軍之餉始終推諉於閩耳如果此次軍務告竣

後廣東所收降卒各軍所散勇丁各屬通誅土匪能保其不復滋生事端則臣之豫留高連陞一軍誠爲過慮若令其隻身赴任責以驟難整理之制兵治不可數計之匪寇勢恐不能計現在高連陞所部除撤遣旋閩外僅留五千餘人每月需餉不過三萬餘兩本年二月起始歸廣東支應並非強以所難如謂仍應歸閩支領則

廣東應解協閩之餉約尙有三十餘萬兩卽以此款悉數移充高連陞軍餉以閩餉濟閩軍約足一軍之需一年之後諸患漸平陸續裁撤此軍亦未爲晚合無請

旨飭下廣東督撫臣熟思審處仍飭高連陞帶所部赴任之處出自

聖裁奏入

上命軍機大臣傳諭左宗棠瑞麟郭嵩燾曰粵東之賊全股蕩平後復經康國器等追捕餘匪並於降人中搜獲逆裔及悍賊數百名立予斬決老弱壯丁分別資遣辦理甚爲妥協該督以蹙馬致舊病增劇現於本月二十四日班師回閩著於到閩後安心調理期於速痊以慰廕繫左宗棠凱旋後粵省安插降卒搜誅土匪善後之事方多正當留紮

勁兵以資鎮遏瑞麟卽咨催高連陞赴廣東提督  
本任何以反令左宗棠將其部曲檄飭回閩該署  
督徒爲推諉該軍餉需起見曾不爲地方計殊昧  
事機該省民風著名刁悍平日所養制兵毫不得  
力徒耗餉需儻閩軍凱撤而降卒土匪又復滋生  
事端重煩兵力該署督其能當此重咎耶高連陞  
所部五千餘人計每月需餉不過三萬餘兩卽著

左宗棠檄飭該提督帶所部赴任月餉由瑞麟郭  
嵩燾按月籌給不准絲毫短欠俟該省伏莽淨盡  
再議裁遣

上諭內閣曰此次官軍搜捕粵東餘匪淨盡軍務告  
竣班師回閩所有出力之福建延建邵道康國器  
著賞給該員三代二品封典遊擊李元順著俟補  
副將後以總兵升用副將鄧在倫著賞加總兵銜

知縣錢誦清著以同知仍留廣東補用以示鼓勵  
僞奉王黃十四卽黃朋厚自上年十二月乞撫後  
密覘賊情隨時稟報復能解散賊黨棄械投誠尙  
屬真心效順黃朋厚著免其治罪並賞給守備銜  
臣等謹案粵匪邊徼莠民萑苻醜類倡亂之  
始不過勢迫飢寒志圖剽掠耳當承平之已  
久偶法網之倖逃遂至怙惡不悛流毒轉甚

煽邪詞以蠱惑逞逆燄以臨張自粵而湘由  
鄂而皖竟至僭稱偽號久踞江甯擾亂十有  
五年蹂躪十有六省負嵎自固滋蔓難圖於  
此而欲氛祲全消奏埽穴擒渠之效方隅底  
定成戡亂致治之功自非聖武布昭安能大  
勳懋集也我

皇上孝先繼志承

慈訓於

兩宮善則歸親告成功於

太廟謂蕩平之奏績皆耆定之

貽謀爰

命儒臣纂修方略臣等公同編輯時共討論竊見夫

文宗顯皇帝默運淵衷廣咨羣策所以奠安寰宇垂裕

後昆者典則俱存篇章可考凡推轂以重將

權詰奸以遏亂略整軍則先明賞罰安衆則  
互設團防兵餉兼籌察民情而曲加軫恤勦  
撫並用解賊勢而深中機宜惟智仁信勇之  
俱全故常變經權之悉合大端可舉管見敬  
陳夫委任不專無以威衆事權不一難以成  
功或同官意少和衷或臨敵患多掣肘每因  
牽制遂致乖方我

文宗顯皇帝特簡欽差大臣督辦軍務假之兵柄授以  
成謀號令既專聲威乃振猶慮敵情不可以  
懸揣而將略或壅於上聞也凡諸臣所奏請  
先清上游之法進扼要隘之方苟可施行必  
加采錄所由腹心與共指臂宣勞同深感奮  
之忱胥效馳驅之力歟進剿大股事歸將臣  
肅清地方責惟疆吏內訌不靖致表裏以爲

奸外侮忽來必應接之不暇我

文宗顯皇帝嚴飭臣工力加整頓遁藏者隨處獵緝竄  
擾者先事隄防咎有攸歸責無旁貸由是賊  
除務盡無分主客之兵師克在和存畛域  
之見各督撫遂與帶兵大臣共成厥功矣治  
軍之有勇知方責歸統帥御將之信賞必罰

斷自

宸衷

國家方久享昇平將士或未諳韜略整飭不亟隕  
越滋多我

文宗顯皇帝訓練戎方申明軍政其有素懷忠藎實著  
戰功畀以恩榮加之懋賞或微員登爲大吏  
或偏裨擢至元戎如觀望而援勦不前退守  
而堵禦不力或粉飾卸過或捏報邀功逮問

必加刑誅莫追斯福威並用功罪已極分明  
亦懲勸兼施羣情愈徵翕服已夫馭將固需  
長策而保民尤有要端從來流寇之患民皆  
驅入賊黨穀易因爲盜糧棄隴畝無以爲生  
遷城邑又猝難自至此民所以重困也我

文宗顯皇帝痼瘵在抱特飭文武大吏行堅壁清野之  
法勸諭居民各修堡寨於是出資出力同澤

同袍消伏莽於萌芽與官軍爲犄角法之盡  
善尤在於此若夫兵不足而議練兵餉不足  
而籌裕餉立法未善流弊實多惟怙冒有深  
仁而權衡歸至當則救時之計尤足見恤民  
之心我

文宗顯皇帝於御宇之初下蠲租之詔恩膏所沛薄海  
同沾迨軍務浹興倉儲多罄發帑不足以饗

士加賦深恐於妨民舉凡釐稅之徵必俟再  
三之請雖通商賈裕度支供飽騰省飛輓其  
利甚溥而

朝廷體恤周至實不得已而用之也當軍事方殷  
之時正供旣優加豁免及賊患稍紓之日釐  
局復大爲減除其勤生聚而憫艱難者不已  
至歛所以自軍興以迄歲事疆臣專案奏報

部臣有冊可稽者用銀至二萬八千六百四十八萬三千餘兩鈔至七百六十六萬五千餘兩錢至八百十八萬八千餘貫需費甚鉅民無擾焉且於招募之徒更得撫馭之法當夫兵皆新集教豈素嫻鈴轄少疏見功尤虞見過遣散不用處變難以處常我

文宗顯皇帝慎始圖終特命帶兵大臣募集鄉兵激其

忠義之心馴彼桀鰲之氣使敵愾而從戎甚  
易卽成功而釋甲不難效用者籍之武營樂  
業者歸其田里誠恩施共沐腴望全消者也  
至辦賊之法勦撫厥爲大端相機而行張弛  
原無定局蓋勦所以行天罰而撫所以散賊  
羣也又況民性至愚始惑邪教從賊旣久或  
生悔心知自首以投誠忍駢誅於乞命斯又

仁之至而義之盡矣欽惟

文宗顯皇帝臨御十有一年爲國鋤奸爲民去害屬凶  
頑之梗化爰

命將而興師撻伐所加聲威丕振首遏狂氛於河朔繼  
殲巨憝於江淮再定荆襄旋收武漢已得建  
瓴之勢安慶合圍期收破竹之功金陵直擣  
乃大勳未集而

龍馭上賓中外臣民莫不感涕我

皇上誕敷新政率由舊章亟思盡殄逆氛乂安百姓  
恭奉兩宮

皇太后親裁庶政指示機宜簡用勳臣而畀以重任激  
勵將士而加以拊循四海同仇三軍效令兩  
露之澤既洽人心雷霆之威足寒賊膽魚在  
釜而獸在檻殘喘僅延車則攻而馬則同膚

公迅奏遂於甲子六月克復江甯蕩平髮逆  
橫海之鯨鯢並殄中澤之鴻雁胥安銘鐵券  
以酬庸奠金甌而保泰良由我

文宗顯皇帝經營有素燭照無遺故能克敵三年收功  
一戰稽之往訓總師致三苗之格命實出於  
重華嗣位爲有扈之征道亦承夫大禹

廟謨昭著千載同符矣臣等考我

朝武功之盛遠播遐荒茲就勦平粵匪論之近事  
可紹

前徽寰中何殊域外蓋創業之盛見於拓土開疆而繼  
世之隆徵諸安民禁暴豈有萬里金湯容狐  
鼠之嘯聚中天日月任魑魅之橫行者哉我  
皇上纘緒承庥揚茲大烈上慰

文宗顯皇帝在天之靈下孚溥海臣民之望永固萬萬

年有道之邦基則茲書之紀美也實與

列聖方略等編炳如日星矣茲編纂勦平粵匪方略四  
百十四卷附以長江水師章程六卷進

呈謹誌大略於左